



Al jeve dal jet,  
al cruste un crostul,  
al brancole pe braide,  
al molç la More,  
al regole il rest,  
al siere il sierai,  
si urtie tal ort,  
al brame un brugnul,  
al cjol cjariesis,  
al solsede cun solêf,  
al ripe un rap,  
al romp il ramaç,  
e vai la vît.

“O ai ai,  
ûfs, uis e urtiçons!”  
Une moscje e cibiscje  
e al craçule il crot.  
Si sinte su la sente,  
al guste di gust,  
e al glot un got.  
Si incuchìs,  
si insunìs,  
si indurmidìs.

Barçjis di bêçs,  
cariolis di carantans,  
dulintor dut indorât  
e fantatis di fantasie!

Paf un pataf!

Spac spaventôs!

Sveiti svelt!

Jeviti, moviti,

A son sîs di orloi,

Su po, vierç i voi!

***di Michele Vuardianut Calligaris***